

# INUIT ATAQATIGIIT INATSISARTUNI



UPA2026/149

21. maj. 2026

Paarma Lund Kreutzmann

**Meeqqap napparsimanerani ullormi siullermi sulinngiffeqarsinnaatitaanerup annertusineqarnissaanut periarfissat kiisalu angajoqqaat qitornami napparsimasup angerlarsimaqatiginissaanut pitsaanagerusunik periarfissiisumik ataqatigiinnerusumik aaqqiissummik pilersinissaannik, Naalackersuisut peqquneqarnissaannik Inatsisartut aalajangiiffigisassaattut siunnersuut. Suliffeqarnermi illuatungerisat oqaloqatiginerisigut nassuiaat suliarineqassaaq, ilutigisaanillu najoqqutassani assigiinngitsuni aningaasatigut, allaffissornikkullu kingunisai ersarissarneqassallutik.**

(Inatsisartunut ilaasortaq Pipaluk Olsen, Demokratit)

Oqaaseqaat

Inuit Ataqatigiit meeqqap pisariaqartitaanik qulakkeerinissamut aammalu Kalaallit Nunaanni ilaqutariinnut meerartalinnut pitsaanagerusumik atugassaqartitsinissamut tamatigut sulissuteqartarpoq.

Pipaluk Olsen Demokratit siunnersuutinnut qujanaq.

Meeqqap napparsimalernerani meeqqap pisariaqartittarpaa toqqissisimaneq, isumagineqarneq qanilaassuserlu qaniginerpaasaminiit. Amerlanertigut taakku tassaasarput angajoqqaat imaluunniit meeqqamut akisussaasut. Meeqqat qaqutikkut ulloq ataasiinnaq napparsimasarpoq, taamaattumillu ilaqutariit amerlasuut annertuumik ajornartoortarput meeqqap napparsimanerani sulinngiffeqarnissamut periarfissat killeqarmata.

Angajoqqaat imaluunniit meeqqamut akisussaasup siusinaarlutik meeraq meeqqeriviliaattariaqartarpaat atuariatertillugilluunniit. Angajoqaannut tamanna ajuusaarnermik ernumanermillu pilersitsisinnaasumik. Ilaqutariinnut pisariaqanngikkaluamik artukkiisinnaavoq aammalu angerlarsimaffimmi suliffimmilu atugarliornermik kinguneqartitsisinnaalluni.

Aammattaaq nappaatit, virusit tuniluunneri annertisarneqarsinnaaneri eqqarsaatigalugu tamanut peqqinnangilaq meeraq napparsimasoq, imaluunniit meeraq suli peqqissivinngitsoq suli tuniluusinnaasoq meeqqeriviliaajaarpallaaruni

# INUIT ATAQATIGIIT INATSISARTUNI



imaluunniit atualjaarpallaaruni. Uani aamma meeqqat kisimi eqqarsaatiginagit kisianni tamakkiisumik, inersimasut sulisut aamma eqqarsaartigaligit.

Kikkut tamarmik periarfissaqanngillat qanigisaminnut ikiorneqarnissamut, aammalu kisimiillutik pilersuisut eqqarsaatigalugit, ajornartorneq annertusinnaasarpoq. Taamaattumik meeqqap napparsimanerani sulinngiffeqartarneq pillugu apeqqt suliffeqarfinnuinaq tunnganngimmat, kisiannili meeqqap atugarissaarnera, innuttaasut peqqissusaat aammalu isumannaatsuunissaq pillugit apeqqutaavoq.

Taamaattumik Inuit Ataqatigiit isumaqarpoq piffissanngortoq aaqqiissutissanik nutaaliaanerusunik ilaqutariinnullu pitsaanerusunik isiginninnissamut. Meeqqap ulloq siulleg aappassalu napparsimanerani sulinngiffeqarnissamut periarfissaq pilersinneqassapat, suliffiup ilaqutariillu akornanni oqimaaqatigiinneq pitsaanerulernissaa, meeqqap atugarissaarnerulernissaa aammalu ilaqutariit nukittunerulernerannik kinguneqartussamik siunertalik.

Pingaaruteqarpoq suliffeqarfiit sulisullu kattuffiisa suliaqarnermi peqataatinneqarnissaat aammalu aaqqiissutissat pisortat namminersortullu suliffeqarfiutaat suleqatigalugit ineriartortinneqarnissaat.

Suliffeqarneq eqaannerusoq ilaqutariinnullu pitsaanerusoq meeqqat angajoqqaallu kisimik iluaqutiginaviannngilaat, aammali suliffimmi avatangiisit peqqissuunerulernerannut aammalu inuiaqatigiinnik nukittunerusunik pilersitsinermut iluaqutaassalluni.

Samling una ingerlanerani uanga nammineq ilaqutariinnut tunngasumik, uunga siunnersuummut aamma attuumassuteqartumik siunnersuuteqarpunga. Nunatsinni ilaqutariit inuuneri pitsaanerulernissaanik, eqaannerulernissaanillu siunertalimmik. Taamaamat una siunnersuut oqallisigineqaqqinnissaanik, periarfissallu misissorneqarnissaanik akuerseqataalluta ilaqutariinnut peqqissutsimullu ataatsimiititaliamut ingerlateqqipparput.